

~ 16  
2690  
3





白氏長慶集卷第一

唐太子少傅刑部尚書致仕贈尚書右僕射太原

白居易樂天著

明後學松江馬元調異甫校

諷諭一 古調詩。五言六十五首

賀雨

皇帝嗣寶曆元和三年冬自冬及春暮不雨旱熯熯持切上心念下民懼歲成災凶遂下罪已詔殷勤制萬邦  
帝曰予一人繼天承祖宗憂勤不遑寧夙夜心忡忡元  
年誅劉闢一舉靖巴邛二年戮李錡不戰安江東顧惟



眇眇德遠有巍巍功或者天降沴無乃傲予躬上思答  
天戒下思致時邕莫如率其身慈和與儉恭乃命罷進  
獻乃命賑饑窮有死降五刑責已寬三農宮女出宣徽  
廢馬減飛龍庶政靡不舉皆由自宸衷奔騰道路人偃  
僕田野翁歡呼相告報感泣涕沾膺順人人心悅先天  
天意從詔下纔七日和氣生冲融凝為悠悠雲散作習  
習風晝夜三日雨淒淒復濛濛萬心春熙熙百穀青芄  
芄蒲紅切人變愁為喜歲易儉為豐乃知王者心憂樂與  
衆同皇天與后土所感無不通冠珮何鏘鏘將相及王  
公蹈舞呼萬歲列賀明庭中小臣誠愚陋職忝金鑾宮

昭和九年  
十一月二日  
購末

稽首再三拜一言獻天聰君以明為聖臣以直為忠敢  
賀有其始亦願有其終

讀張籍古樂府

張君何為者業文三十春猶工樂府詩舉代少其倫為  
詩意如何六義互鋪陳風雅比興外未嘗著空文讀君  
學仙詩可諷放佚君讀君董公詩可誨貪暴臣讀君商  
女詩可感悍婦仁讀君勤齊詩可勸薄夫敦上可禪教  
化舒之濟萬民下可理情性卷之善一身始從青衿歲  
迨此白髮新日夜秉筆吟心苦力亦勤時無采詩官委  
棄如泥塵恐君百歲後滅沒人不聞願藏中祕書百代



不湮淪願播內樂府時得聞至尊言者志之苗行者文  
之根所以讀君詩亦知君為人如何欲五十官小身賤  
貧病眼街西住無人行到門

哭孔戡

洛陽誰不死戡死聞長安我是知戡者聞之涕泣然戡  
佐山東軍非義不可干拂衣向西來其道直如絃從事  
得如此人人以為難人言明明代合置在朝端或望居  
諫司有事戡必言或望居憲府有邪戡必彈惜哉兩不  
諧沒齒為閑官竟不得一日蹇蹇立君前形骸隨衆心  
斂葬北邙山平生剛腸內直氣歸其閒居顏賢者為生

民生死懸在天謂天不愛人胡為生其賢謂天果愛民  
胡為奪其年茫茫元化中誰執如此權

凶宅

長安多大宅列在街西東往往朱門內房廊相對空  
鳴松桂枝狐藏蘭菊叢蒼苔黃葉地日暮多旋風前主  
為將相得罪竄巴庸後主為公卿寢疾歿其中連延四  
五主殃禍繼相鍾自從十年來不利主人翁風雨壞簷  
隙蛇鼠穿牆墉人疑不敢買日毀土木功嗟嗟俗人心  
甚矣其愚蒙但恐災將至不思禍所從我今題此詩欲  
悟迷者曾凡為大官人年祿多高崇權重持難久位高



勢易窮驕者物之盈老者數之終四者如寇盜日夜來  
相攻假使居吉土孰能保其躬因小以明大借家可諭  
邦叶通周秦宅峭函其宅非不同一興八百年一死望  
夷宮寄語家與國人凶非宅凶

夢仙

人有夢仙者夢身升上清坐乘一白鶴前引雙紅旌羽  
衣忽飄飄玉鸞俄錚錚半空直下視人世塵冥冥漸失  
鄉國處纒分山水形東海一片白列岳五點青須臾羣  
仙來相引朝玉京安期羨門輩列侍如公卿仰謁玉皇  
帝稽首前致誠帝言汝仙才努力勿自輕却後十五年

期汝不死庭再拜受斯言既寤喜且驚祕之不敢泄誓  
志居巖扃涓管切恩愛捨骨肉飲食斷羶腥朝飧雲母散  
夜吸沆何黨切瀼奚介切精空山三十載日望輜軿迎前期  
過已久鸞鶴無來聲齒髮日衰白耳目減聰明一朝同  
物化身與糞壤并神仙信有之俗力非可營苟無金骨  
相不列丹臺名徒傳辟穀法虛受燒丹經只自取勤苦  
百年終不成悲哉夢仙人一夢誤一生

觀刈麥

時為盩厔縣尉○盩音周厔音質

田家少閑月五月人倍忙夜來南風起小麥覆隴黃婦  
姑荷簞食童稚攜壺漿相隨餉田去丁壯在南岡足蒸



暑土氣背灼炎天光力盡不知熱但惜夏日長復有貧  
婦人抱子在其傍右手秉遺穗左臂懸弊筐聽其相顧  
言聞者為悲傷家田輸稅盡拾此充饑腸今我何功德  
曾不事農桑吏祿三百石歲晏有餘糧念此私自愧盡  
日不能忘

題海圖屏風

元和己丑年作

海水無風時波濤安悠悠鱗介無小大遂性各沉浮突  
兀海底鼉首冠三神丘鈞網不能制其來非一秋或者  
不量力謂茲鼉可求旁謎鼉與計切率不動綸絕沉其  
鉤一鼉既頓領諸鼉齊掉頭白濤與黑浪呼吸繞咽喉

噴風激飛廉鼓波怒陽侯鯨鯢得其便張口欲吞舟萬  
里無活鱗百川多倒流遂使江漢水朝宗意亦休蒼然  
屏風上此畫良有由

羸駿

驂騑失其主羸餓無人牧向風嘶一聲莽蒼黃河曲蹋  
冰水畔立臥雪塚間宿歲暮田野空寒草不滿腹豈無  
市駿者盡是凡人目相馬失於瘦遂遺千里足村中何  
擾擾有吏徵芻粟淪彼軍廩中化作駑駘肉

廢琴

絲桐合為琴中有大古聲古聲淡無味不稱今日情玉



白集 卷一  
微光彩滅朱絃塵土生廢葉來已久遺音尚泠泠不辭  
爲君彈縱彈人不聽何物使之然羌笛與秦箏

李都尉古劍

古劍寒黯黯鑄來幾千秋白光納日月紫氣排斗牛有  
客借一觀愛之不敢求湛然玉匣中秋水澄不流至寶  
有本性精剛無與儔可使寸寸折不能繞指柔願快直  
士心將斷佞臣頭不願報小怨夜半刺私讐勸君慎所  
用無作神兵羞

雲居寺孤桐

一株青玉立千葉綠雲委亭亭五丈餘高意猶未已山

僧年九十清淨老不死自云手種時一顆苦果切青桐子  
直從萌芽拔高自毫末始四面無附枝中心有通理寄  
言立身者孤直當如此

京兆府新栽蓮

時爲藍屋縣尉趨府作

汚溝貯濁水水上葉田田我來一長歎知是東溪蓮下  
有清泥汚馨香無復全上有紅塵撲顏色不得鮮物性  
猶如此人事亦宜然託根非其所不如遭棄捐于權切昔  
在溪中日花葉媚清漣今來不得地顛顛頓萃音府門前

月夜登閣避暑

暑久炎氣甚中人若燔燒清風隱何處草樹不動搖何



白集 卷一  
以避暑氣無如出塵囂行行都門外佛閣正岩崑清涼  
近高生煩熱委靜銷開襟當軒坐神泰意飄飄廻看歸  
路傍禾黍盡枯焦獨善誠有計將何救旱苗

初授拾遺

奉詔登左掖束帶參朝議何言初命卑且脫風塵吏杜  
甫陳子昂才名括天地當時非不遇尚無過斯位況予  
蹇薄者寵至不自意驚近白日光慙非青雲器天子方  
從諫朝廷無忌諱豈不思匪躬適遇時無事受命已旬  
月飽食隨班次諫紙忽盈箱對之終自愧

贈元稹

自我從宦遊七年在長安所得惟元君乃知定交難豈  
無山上苗徑寸無歲寒豈無要津水咫尺無波瀾之子  
異於是久處誓不讓萱音無波古井水有節秋竹竿一爲  
同心友三及芳歲蘭花下鞦韆馬遊雪中杯酒歡衡門相  
逢迎不具帶與冠春風日高睡秋月夜深看不爲同登  
科不爲同署官所合在方寸心源無異端

哭劉敦質

小樹兩株栢新土三瓦墳蒼蒼白露草此地哭劉君哭  
君豈無辭辭云君子人如何天不弔窮悴至終身愚者  
多貴壽賢者獨賤迤龍亢彼無悔螻屈此不伸哭罷持



此辭吾將詰義文

答友問

大圭廉不割利劍用不缺當其斬馬時良玉不如鐵置  
鐵在洪爐鐵消易如雪良玉同其中三日燒不熱君疑  
木與德詠此知優劣

雜興三首

楚王多內寵傾國選嬪妃又愛從禽樂馳騁每相隨錫  
鞬哥詭臂花隼羅袂控金羈遂習宮中女皆如馬上兒  
色禽合為荒刑政兩已衰思誰雲夢春仍獵章華夜不  
歸東風二月天春鴈正離離美人挾銀鐏一發疊雙飛

飛鴻驚斷行斂翅避蛾眉君王顧之笑弓箭生光輝迴  
眸語君曰昔聞莊王時有一愚夫人其名曰樊姬不有  
此遊樂三載斷鮮肥

越國政初荒越天旱不已風日燥水田水涸塵飛起國  
中新下令官渠禁流水流水不入田壅入王宮裏餘波  
養魚鳥倒影浮樓雉澹灩九折池縈迴十餘里四月芝  
荷發越王日遊嬉左右好風來香動芙蓉菜但愛芙蓉  
香又種芙蓉子不念閭門外千里稻苗死  
吳王心日侈服玩盡奇瓌音回又身臥翠羽帳手持紅  
玉杯冠垂明月珠帶束通天犀行動自矜顧數步一徘徊



徇小人知所好懷寶四方來奸邪得藉手從此倖門開  
古稱國之寶穀米與賢才今看君王眼視之如塵灰伍  
員諫已死浮屍去不迴姑蘇臺下草麋鹿間生麕

宿紫閣山北村

晨遊紫閣峯暮宿山下村村老見予喜為予開一樽舉  
杯未及飲暴卒來入門紫衣挾刀斧草草十餘人奪我  
席上酒掣我盤中殮主人退後立斂手反如賓中庭有  
奇樹種來二十春主人惜不得持斧斷其根口稱采造  
家身屬神策軍主人慎勿語中尉正承恩

讀漢書

禾黍與稂莠雨來同日滋桃李與荆棘霜降同夜萎草  
木既區別榮枯那等莫茫茫天地意無乃太無私小人  
與君子用置各有宜奈何西漢末忠邪並信之不然盡  
信忠早絕邪臣窺不然盡信邪早使忠臣知優游兩不  
斷盛業日已衰痛矣蕭京輩終令陷禍機蕭望之京房等每讀  
元成紀憤憤令人悲寄言為國者不得學天時寄言為  
臣者可以鑒於斯

贈樊著作

陽城為諫議以正事其君其手如屈軼舉必指佞臣卒  
使不仁者不得秉國鈞元稹為御史以直立其身其心



白集 卷一 九  
如肺石動必達窮民東川八十家冤憤一言伸劉關肆  
亂心殺人正紛紛其嫂曰庾氏棄絕不為親從史萌逆  
節隱心潛負恩其佐曰孔戡捨去不為賓凡此士與女  
其道天下聞常恐國史上但記鳳與麟賢者不為名名  
彰教乃敦每惜若人輩身死名亦淪君為著作郎職廢  
志空存雖有良史才直筆無所申何不自著書實錄彼  
善人編為一代言以備史闕文

蜀路石婦

道傍一石婦無記亦無銘傳是此鄉女為婦孝且貞十  
五嫁邑人十六夫征行夫行二十載婦獨守孤筵其夫

有父母老病不安寧其婦執婦道一一如禮經晨昏問  
起居恭順發心誠藥餌自調節膳羞必甘馨夫行竟不  
歸婦德轉光明後人高其節刻石像婦形儼然整衣巾  
若立在閨庭似見舅姑禮如聞環珮聲至今為婦者見  
此孝心生不比山頭石空有望夫名

折劍頭

拾得折劍頭不知折之由一握青蛇尾數寸碧峯頭疑  
是斬鯨鯢不然刺蛟虬缺落泥土中委棄無人收我有  
鄙介性好剛不好柔勿輕直折劍猶勝曲全鉤

登樂遊園望



獨上樂遊園四望天日曛東北何靄靄宮闕入煙雲愛  
 此高處立忽如遺垢氛耳目暫清曠懷抱鬱不伸下視  
 十二街綠樹閒紅塵車馬徒滿眼不見心所親孔生死  
 洛陽元九謫荆門可憐南北路高蓋者何人

酬元九對新栽竹有懷見寄

頃有贈元九詩云  
有節秋竹竿故元

感之因  
重見寄

昔我十年前與君始相識會將秋竹心風霜侵不得始  
 嫌梧桐樹秋至先改色不愛楊柳枝春來軟無力憐君  
 別我後見竹常相憶常欲在眼前故栽庭戶側分首今  
 何處君南我在北吟我贈君詩對之心惻惻

感鶴

鶴有不羣者飛飛在野田饑不啄腐鼠渴不飲盜泉貞  
 姿自耿介雜鳥何翩翩呼淵切同遊不同志如此十餘年  
 一興嗜慾念遂為贈繳牽委質小池內爭食羣雞前不  
 惟懷稻梁兼亦競腥羶不惟戀主人兼亦狎鳥為物心  
 不可知天性有時遷一飽尚如此況乘大夫軒

春雪

元和歲在卯六年春二月月晦寒食天天陰夜飛雪連  
 宵復竟日浩浩殊未歇大似落鷲毛密如飄玉屑寒銷  
 春茫上聲蒼上聲氣變風凜冽上林草盡沒曲江水復結紅



乾杏花死綠凍楊柳折所憐物性傷非惜年芳絕上天  
有時令四序平分別寒燠苟反常物性皆天閱阿葛切我  
觀聖人意魯史有其說或記水不冰或書霜不殺上將  
微政教下以防災孽茲雪今如何信美非時節

高僕射

富貴人所愛聖人去其泰所以致仕年著在禮經內玄  
元亦有訓知止則不殆二疎獨能行遺跡東門外清風  
久銷歇追此向千載斯人古亦稀何況今之代遑遑名  
利客白首千百輩唯有高僕射七十懸車蓋我年雖未  
老歲月亦云邁預恐老及時貪榮不能退中心私自傲

何以爲我戒故作僕射詩書之於大帶

白牡丹

和錢學士作

城中看花客且暮走營營素華人不顧亦占牡丹名開  
在深寺中車馬無來聲唯有錢學士盡日遶叢行憐此  
皓然質無入自芳馨衆嫌我獨賞移植在中庭留景夜  
不暝迎光曙先明對之心亦靜虛白相向生唐昌玉藥  
花攀翫衆所爭折來比顏色一種如瑤瓊彼因稀見貴  
此以多爲輕始知無正色愛惡隨人情豈惟花獨爾理  
與人事并君看入眼者紫艷與紅英

贈內



生為同室親死為同穴塵他人尚相勉而況我與君黔  
婁固窮士妻賢忘其貧冀缺一農夫妻敬儼如賓陶潛  
不營生翟氏自爨新梁鴻不肯仕孟光甘布裙君雖不  
讀書此事耳亦聞至此千載後傳是何如人人生未死  
間不能忘其身所須者衣食不過飽與溫蔬食足充饑  
何必嘗膏珍繒絮足禦寒何必錦繡文君家有貽訓清  
白遺子孫我亦貞苦士與君新結婚庶保貧與素偕老  
同欣欣

寄唐生

賈誼哭時事阮籍哭路岐唐生今亦哭異代同其悲唐

生者何人五十寒且饑不悲口無食不悲身無衣所悲  
忠與義悲甚則哭之太尉擊賊日殺太尉以笏擊朱泚尚書叱盜  
時顏尚書此李希烈大夫死兇寇陸大夫為亂兵所害諫議謫蠻夷楊諫議左  
州遷道每見如此事聲發涕輒隨往往聞其風俗士猶或  
非憐君頭半白其志竟不衰我亦君之徒鬱鬱何所為  
不能發聲哭轉作樂府詩篇篇無空文句句必盡規功  
高虞人箴痛甚騷人辭非求官律高不務文字奇惟歌  
生民病願得天子知未得天子知甘受時人嗤藥良氣  
味苦琴淡音聲稀不懼權豪怒亦任親朋饑人竟無奈  
何呼作狂男兒每逢羣盜息或遇雲霧披但自高聲歌



庶幾天聽卑歌哭雖異名所感則同歸寄君三十章與君為哭詞

傷唐衢二首

自我心存道外物少能逼常排傷心事不為長歎息忽聞唐衢死不覺動顏色悲端從東來觸我心惻惻伊昔未相知偶遊滑臺側同宿李翺家一言如舊識酒酣出送我風雪黃河北日西並馬頭語別至昏黑君歸向東鄭我來遊上國交心不交面從此重相憶憐君需家子不得詩書方五十着青衣試官無祿食遺文僅千首六義無差忒散在京洛閒何人為收拾

憶昨元和初忝備諫官位是時兵革後生民正憔悴但傷民病痛不識時已諱遂作秦中吟一吟悲一事貴人皆怪怒閒人亦非訾天高未及聞荆棘生滿地惟有唐衢見知我平生志一讀興歎嗟再吟垂涕泗因和三十韻手題遠緘寄致吾陳杜閒賞愛非常意此人無復見此詩猶可貴今日開篋看蠹魚損文字不知何處葬欲問先獻歛終去哭墳前還君一掬淚

問友

種蘭不種艾蘭生艾亦生根艾相交長莖葉相附榮香

唐衢詩也



莖與臭葉日夜俱長大鋤艾恐傷蘭既蘭恐滋艾蘭亦  
未能既艾亦未能除沉吟意不決問君欲何如

悲哉行

悲哉為儒者力學不知疲讀書眼前聞東筆手生胝支音  
十上方一第成名常苦遲縱有宦達者兩鬢已成絲可  
憐少壯日適在窮賤時丈夫老且病焉用富貴為沉沉  
朱門宅中有乳臭兒狀貌如婦人光明膏梁肌手不把  
書卷身不掇胡慣切戎衣二十襲封爵門承勳戚資春來  
日日出服御何輕肥朝從博徒飲暮有娼樓期平封還  
酒債堆金選蛾眉聲色狗馬外其餘一無知山苗與澗

松地勢隨高卑古來無奈何非君獨傷悲

紫藤

藤花紫蒙茸藤葉青扶疎誰謂好顏色而為害有餘下  
如蛇屈盤上若繩縈紆可憐中間樹束縛成枯株柔蔓  
不自勝嫋嫋挂空虛豈知纏樹木千夫力不如先柔後  
為害有似諛佞徒附著君權勢君迷不肯誅又如妖婦  
人網繆蠱其夫奇邪壞入室夫惑不能除寄言邦與家  
所慎在其初毫末不早辨滋蔓信難圖願以藤為戒銘  
之於座隅

放鷹



十月鷹出籠草枯雉兔肥下韞切哥謳隨指顧百擲無一遺鷹翅疾如風鷹爪利如錐本為鳥所設今為人所資孰能使之然有術甚易知取其向背性制在饑飽時不可使長飽不可使長饑饑則力不足飽則背人飛乘饑縱搏擊未飽須繫維所以爪翅功而人坐收之聖明馭英雄其術亦如斯鄙語不可棄吾聞諸獵師

慈烏夜啼

慈烏失其母啞啞切下吐哀音晝夜不飛去經年守故林夜夜半啼聞者為沾襟聲中如告訴未盡反哺心百鳥豈無母爾獨哀怨深應是母慈重使爾悲不任昔

有吳起者母歿喪不臨嗟哉斯徒輩其心不如禽慈烏復慈烏鳥中之曾參

鷺詩示劉叟并序

叟有愛子背叟逃去叟甚悲念之叟少年亦嘗如是故作鷺詩以諭之

梁上有雙鷺翩翩雄與雌銜泥兩椽間一巢生四兒四兒日夜長索食聲孜孜青蟲不易捕黃口無飽期窮爪雖欲弊心力不知疲須臾千來往猶恐巢中饑辛勤三十日母瘦雛漸肥喃喃教言語一一刷毛衣一旦羽翼成引上庭樹枝舉翅不回顧隨風四散飛雌雄空中鳴



聲盡呼不歸却入空巢裏啁啾終夜悲  
鷺鷥爾勿悲爾當返自思思爾為雛日高飛背母時當時父母念今日爾應知

采地黃者

麥死春不雨禾損秋早霜歲晏無口食田中采地黃采之將何用持以易餽糧凌晨荷鋤去薄暮不盈筐攜來朱門家賣與白面郎與君啖肥馬可使照地光願易馬殘粟救此苦饑腸

初入太行路

天冷日不光太行峯蒼莽嘗聞此中險今我方獨往馬

蹄凍且滑羊腸不可上若比世路難猶自平於掌

鄧魴張徹落第

古琴無俗韻奏罷無人聽寒松無妖花枝下無人行春風十二街軒騎不暫停奔車看牡丹走馬聽秦箏眾目悅芳艷松獨守其貞眾耳喜鄭衛琴亦不改聲懷哉二夫子念此無自輕

送王處士

王門豈無酒侯門豈無肉主人貴且驕待客禮不足望塵而拜者朝夕走碌碌王生獨拂衣遐舉如雲鶴寧歸白雲外飲水臥空谷不能隨眾人斂手低眉目扣門與



我別沽酒留君宿好去采薇人終南山正綠

村居苦寒

八年十二月五日雪紛紛竹柏皆凍死况彼無衣民迴  
觀村間閒十室八九貧北風利如劍布絮不蔽身唯燒  
蒿棘火愁坐夜待晨乃知太寒歲農者猶苦辛顧我當  
此日草堂深掩門褐裘覆絕甲之切被坐臥有餘溫幸免  
饑凍苦又無壠畝勤念彼深可愧自問是何人

納粟

有吏夜扣門高聲催納粟家人不待曉場上張燈燭揚  
簸淨如珠一車三十斛猶憂納不中鞭責及僮僕昔余

謬從事內愧才不足連授四命官坐尸十年祿常聞古  
人語損益周必復今日諒甘心還他太倉穀

薛中丞

百人無一直百直無一遇借問遇若誰正人行得路中  
丞薛存誠守直心甚固皇明燭如日再使秉王度奸豪  
與佞巧非不憎且懼直道漸光明邪謀難蓋覆每因匪  
躬節知有匡時其張為墜網綱倚作頽簷柱悠哉上天  
意報施紛迴互自古已冥茫從今猶不論豈與小人意  
昏然同好惡不然君子人何反如朝露裊相昨已失薛  
君今又去以我惜賢心五年如且暮况聞善人命長短



繫運數今我一涕零豈為中丞故

秋池二首

前池秋始半卉物多摧壞欲暮槿先委未霜荷已敗默  
然有所感可以從茲誠本不種松筠早凋何足怪  
鑿池貯秋水中有蘋與芰天旱水暗消塌然委空地有  
似汎汎者附離權與貴一旦恩勢移相隨共憔悴

夏旱

太陰不離畢太歲仍在午旱日與炎風枯憊我田畝金  
石欲銷鏹况茲禾與黍嗷嗷萬族中唯農最辛苦憫然  
望歲者出門何所覩但見棘與茨蘿生徧場圃惡苗承

診疾音氣欣然得其所感此因問天可能長不雨

諭友

昨夜霜一降殺君庭中槐乾葉不待黃索索飛下來憐  
君感物節晨起步前階臨風蹋葉立半日顏色衰西望  
長安城歌鍾十二街何人不歡樂君獨心悠哉白日頭  
上走朱顏鏡中頽平生青雲心銷化成死灰我今贈一  
言勝飲酒千杯其言雖甚鄙可破悒悒懷朱門有勲貴  
陋巷有顏回窮通各有命不繫才不才推此自裕裕不  
必待安排

丘中有一士二首

命首句為題



丘中有一士不知其姓名面色不憂苦血氣常和平每  
選隙地居不謁要路行舉動無尤悔物莫與之爭藜藿  
不充腸布褐不蔽形終歲守窮餓而無嗟歎聲豈是愛  
貧賤深知時俗情勿矜羅弋巧鸞鶴在冥冥  
丘中有一士守道歲月深行披帶索衣坐拍無絃琴不  
飲濁泉水不息曲木陰所逢苟非義糞土千黃金鄉人  
化其風薰如蘭在林智愚與強弱不忍相欺侵我欲訪  
其人將行復沉吟何必見其面但在學其心

新製布裘

桂布白似雪吳綿軟於雲布重綿且厚爲裘有餘溫朝

擁坐至暮夜覆眠達晨誰知嚴冬月支體暖如春中夕  
忽有念撫裘起逡巡丈夫貴兼濟豈獨善一身安得萬  
里裘蓋裹周四垠穩暖皆如我天下無寒人

杏園中棗樹

人言百果中唯棗凡且鄙皮皴七倫切似龜手葉小如鼠  
耳胡爲不自知生花此園裏豈宜遇攀翫幸免遭傷毀  
二月曲江頭雜英紅旖旎棗亦在其間如嫫莫胡切對西  
子東風不擇木吹煦長未已眼看欲合抱得盡生生理  
寄言遊春客乞君一迴視君愛繞指柔從君憐柳杞君  
求悅目艷不敢爭桃李君若作太車輪軸材須此



蝦蟇和張十六

嘉魚薦宗廟靈龜貢邦家應龍能致雨潤我百穀芽蠢  
蠢水族中無用者蝦蟇謨加切形穢肌肉腥出沒於泥沙  
六月七月交時雨正霽電蝦蟇得其志快樂無以加地  
既蕃其生使之族類多天又與其聲得以相誼譁豈惟  
玉池上汚君清冷波何獨瑤瑟前亂君鹿鳴歌常恐飛  
上天跳躍隨姮娥往往蝕明月遣君無奈何

寄隱者

賣藥向都城行憇青門樹道逢馳驛者色有非常懼親  
族走相送欲別不敢住私怪問道傍何人復何故云是

右丞相當國握樞務祿厚食萬錢恩深日三顧昨日延  
英對今日崖州去由來君臣閒寵辱在朝暮青青東郊  
草中有歸山路歸去臥雲人謀身計非誤

放魚自此後詩到江州作

曉日提竹籃家僮買春蔬青青芹蕨下疊臥雙白魚無  
聲但呀呀以氣相煦濡傾籃寫地上撥刺長尺餘豈唯  
刀机憂坐見螻蟻圖脫泉雖已久得水猶可蘇放之小  
池中且用救乾枯水小池窄狹動尾觸四隅一時幸苟  
活久遠將何如憐其不得所移放於南湖南湖連西江  
好去勿踟躕施恩即望報吾非斯人徒不須泥沙底辛



苦覓明珠

文柏牀

陵上有老柏柯葉寒蒼蒼朝為風煙樹暮為宴寢牀以其多奇文宜升君子堂刮削露節目拂拭生輝光玄班狀狸首素質如截肪敷那切雖充悅目既終乏周身防華彩誠可愛生理苦已傷方知自殘者為有好文章

潯陽三題 并序

廬山多桂樹潯浦多修竹東林寺有白蓮花皆植物之貞勁秀異者雖宮園省寺中未必能盡有夫物以多為賤故南方人不貴重之至有蒸爨其桂剪棄其竹白眼

於蓮花者予惜其不生於北土也因賦三題以唁之

廬山桂

偃蹇月中桂結根依青天天風繞月起吹予下人間飄零委何處乃落匡廬山生為石上桂葉如剪碧鮮枝幹日長大根叢日牢堅不歸天上月空老山中年廬山去咸陽道里三四千無人為移植得入上林園不及紅花樹長栽溫室前

潯浦竹

潯陽十月天天氣仍溫燠有霜不殺草有風不落木玄冥氣力薄草木冬猶綠誰肯潯浦頭迴眼看修竹其有



顧盼者持刀斬且東剖劈青琅玕家家蓋牆屋吾聞汾  
晉聞竹少重如玉胡爲取輕賤生此西江曲

東林寺白蓮

東林北塘水湛湛見底清中生白芙蓉苗苞二百莖白  
日發光彩清飈散芳馨洩香銀囊破瀉露玉盤傾我慙  
塵埃眼見此瓊瑤英乃知紅蓮花虛得清淨名夏萼敷  
未歇秋芳結纔成夜深衆僧寢獨起繞池行欲收一顆  
子寄向長安城但恐出山去人間種不生

大水

潯陽郊郭閒大水歲一至閭閻半漂蕩城堞多傾墜蒼

范生海色渺漫連空翠風卷白波翻日前紅浪沸工商  
徹屋去牛馬登山避况當率稅時頗害農桑事獨有傭  
舟子鼓棹生意氣不知萬人災自覓錐刀利吾無奈爾  
何爾非久得志九月霜降後水涸爲平地

白氏長慶集卷第一終



白氏長慶集卷第二  
唐太子少傅刑部尚書致仕贈尚書右僕射太原  
白居易樂天著  
明後學松江馬元調巽甫校  
諷諭二 古調詩五言凡五十八首  
續古詩十首  
戚戚復戚戚送君遠行役行役非中原海外黃沙積伶  
俚獨居妾迢遞長征客君望功名歸妾憂生死隔誰家  
無夫婦何人不離拆所恨薄命身嫁遲別日迫妾身有  
存沒妾心無改易生為閨中婦死作山頭石



白氏長慶集卷第二

唐太子少傅刑部尚書致仕贈尚書右僕射太原

白居易樂天著

明後學松江馬元調巽甫校

諷諭二 古調詩五言凡五十八首

續古詩十首

戚戚復戚戚送君遠行役行役非中原海外黃沙積伶  
俚獨居妾迢遞長征客君望功名歸妾憂生死隔誰家  
無夫婦何人不離拆所恨薄命身嫁遲別日迫妾身有  
存沒妾心無改易生為閨中婦死作山頭石



掩淚別鄉里飄飄將遠行茫茫綠野中春盡孤客情驅  
馬上丘隴高低路不平風吹棠梨花啼鳥時一聲古墓  
何代人不知姓與名化作路傍土年年春草生感彼忽  
自悟今我何營營

朝采山上薇暮采山上薇歲晏薇亦盡飢來何所爲坐  
飲白石水手把青松枝擊節獨長嘯其聲清且悲擁馬  
非不肥所苦常繫維豢豕非不飽所憂竟爲犧行行歌  
此曲以慰常苦饑

雨露長纖草山苗高入雲風雪折勁木澗松摧爲薪風  
摧此何意雨長彼何因百丈澗底死寸莖山上春可憐

苦節士感此涕盈巾

窈窕雙鬟女容德俱如玉晝居不踰闕夜行常秉燭氣  
如含露蘭心如貫霜竹宜當備嬪御胡爲守幽獨無媒  
不得選年忽過三六歲暮望漢官誰在黃金屋邯鄲進  
娼女能唱黃花曲一曲稱君心恩榮連九族

栖栖遠方士讀書三十年業成無知已徒步來入關長  
安多王侯英俊競攀援幸隨衆賓未得廁門館聞東閣  
有旨酒中堂有管絃何爲向隅客對此不開顏富貴無  
是非主人終日歡貧賤多悔尤客子終夜歎歸去復歸  
去故鄉貧亦安



涼風飄嘉樹，日夜減芳華。下有感秋婦，攀條苦悲嗟。我  
本幽閑女，結髮事豪家。豪家多婢僕，門內頗驕奢。良人  
近封侯，出入鳴玉珂。自從富貴來，恩薄讒言多。家婦獨  
守禮，羣妾互奇衰。斜音但信言有玷，不察心無瑕。容光未  
銷歇，歡愛忽蹉跎。何意掌上玉，化為眼中砂。盈盈一尺  
水，浩浩千丈河。勿言小大異，隨分有風波。閨房猶復爾，  
邦國當如何。

心亦無所迫，身亦無所拘。何為腸中氣，鬱鬱不得舒。不  
舒良有以，同心久離居。五年不見面，三年不得書。念此  
吟人老，抱膝坐長吁。豈無盈樽酒，非君誰與娛。

攬衣出門行，遊觀遠林渠。澹澹春水暖，東風生綠蒲。上  
有和鳴鴈，下有掉尾魚。飛沉一何樂，鱗羽各有徒。而我  
方獨處，不與之子俱。顧彼自傷已，禽魚之不如。出遊欲  
遣憂，孰知憂有餘。

秦中吟十首 并序

貞元元和之際，予在長安，聞見之間，有足悲者，因直歌  
其事，命為秦中吟。



議婚

天下無正聲悅耳即為娛人間無正色悅目即為姝顏  
 色非相遠貧富則有殊貧為時所棄富為時所趨紅樓  
 富家女金縷繡羅襦見人不斂手嬌凝二八初母兄未  
 開口已嫁不須更綠窓貧家女寂寞二十餘荆釵不直  
 錢衣上無真珠幾迴人欲聘臨日又踟躕主人會良媒  
 置酒滿玉壺四座且勿飲聽我歌兩途富家女易嫁嫁  
 早輕其夫貧家女難嫁嫁晚孝於姑聞君欲娶婦娶婦  
 意何如

重賦

厚地植桑麻所要濟生民生民理布帛所求活一身身  
 外克征賦上以奉君親國家定兩稅本意在愛人厥初  
 防其淫明敕內外臣稅外加一物皆以枉法論奈何歲  
 月久貪吏得因循浚我以求寵斂索無冬春織絹未成  
 疋纜絲未盈斤里胥迫我納不許暫逡巡歲暮天地閉  
 陰風生破村夜深煙火盡霰雪白紛紛幼者形不蔽老  
 者體無溫悲喘與寒氣併入鼻中辛昨日輸殘稅因窺  
 官庫門繒帛如山積絲絮似雲屯號為羨餘物隨月獻  
 至尊奪我身上暖買爾眼前恩進入瓊林庫歲久化為  
 塵



傷宅

誰家起甲第朱門大道邊豐屋中櫛比高牆外廻環  
 纍六七堂棟宇相連延一堂費百萬鬱鬱起青煙洞房  
 溫且清寒暑不能干高堂虛且迴坐臥見南山繞廊紫  
 藤架夾砌紅藥欄攀枝摘櫻桃帶花移牡丹主人此中  
 坐十載為太官厨有臭敗肉庫有貫朽錢誰能將我語  
 問爾骨肉閒豈無窮賤者忍不救饑寒如何奉一身直  
 欲保千年不見馬家宅今作奉誠園

傷友

又云傷苦節士

陋巷孤寒士出門苦恓恓雖云志氣在豈免顏色低

生同門友通籍在金閨曩者膠漆契邇來雲雨睽正逢  
 下朝歸軒騎五門西是時天久陰三日雨淒淒蹇驢避  
 路立肥馬當風嘶迴頭忘相識占道上沙堤昔年洛陽  
 社貧賤相提攜今日長安道對面隔雲泥近日多如此  
 非君獨慘悽死生不變者唯聞任與黎任公孫黎逢

不致仕

七十而致仕禮法有明文何乃貪榮者斯言如不聞可  
 憐八九十齒墮雙眸昏朝露貪名利夕陽憂子孫掛冠  
 顧翠綫懸車惜朱輪金章腰不勝僂僕入君門誰不愛  
 富貴誰不戀君恩年高須告老名遂合退身少時共嘆



詩集卷二  
五  
誚晚歲多因循賢哉漢二疎彼獨是何人寂寞東門路  
無人繼去塵

立碑

勲德既下衰文章亦陵夷但見山中石立作路旁碑銘  
勲悉太公敘德皆仲尼復以多爲貴千言直萬貫爲文  
彼何人想見下筆時但欲愚者悅不思賢者嗤豈獨賢  
者嗤仍傳後代疑古石蒼苔字安知是愧詞我聞望江  
縣魏令名在官有仁政名不聞京師身歿  
欲歸葬百姓遮路岐攀轅不得去留葬此江湄至今道  
其名男女涕皆垂無人立碑碣唯有邑人知

輕肥

意氣驕滿路鞍馬光照塵借問何爲者人稱是內臣朱  
紱皆大夫紫綬或將軍誇赴軍中宴走馬去如雲罽毼  
溢九醞水陸羅八珍果擘洞庭橘膾切天池鱗食飽心  
自若酒酣氣益振是歲江南旱衢州人食人

五絃

清歌且罷唱紅袂亦停舞趙叟抱五絃宛轉當宵撫大  
聲麗若散颯颯悉合切風和雨小聲細欲絕切鬼神  
語又如鵲報喜轉作鴉啼苦十指無定音顛倒宮徵羽  
坐客聞此聲形神若無主行客聞此聲駐足不能舉嗟



嗟俗人耳好今不好古所以綠窓琴日日生塵上

歌舞

秦中歲云暮大雪滿皇州雪中退朝者朱紫盡公侯貴  
有風雲興富無饑寒憂所管唯第宅所務在追遊朱門  
車馬客紅燭歌舞樓歡酣促密坐醉暖脫重裘秋官爲  
主人廷尉居上頭日中爲一樂夜半不能休豈知閹分  
切鄉獄中有凍死囚

買花

帝城春欲暮喧喧車馬度共道牡丹時相隨買花去貴  
賤無常價酬直看花數灼灼百朵紅萋萋五束素上張

幄幕庇旁織芭籬護水洒復泥封移來色如故家家習  
爲俗人人迷不悟有一田舍翁偶來買花處低頭獨長  
歎此歎無人諭一叢深處花十戶中人賦

贈友五首 并序

吾友有王佐之才者以致君濟人爲已任識者深許之  
因贈是詩以廣其志云

一年十二月每月有常令君出臣奉行謂之握金鏡由  
茲六氣順以遂萬物性時令一反常生靈受其病周漢  
德下衰王風始不競又從斬晁錯諸侯益強盛百里不  
同禁四時自爲政盛夏興土功方春勸人命誰能救其



失待君佐邦柄我象魏門懸法藝倫正

銀生楚山曲金生鄱溪濱南人棄農業求之多苦辛披  
砂復鑿石屹屹無冬春手足盡皸切七倫 胝愛利不愛身  
畚田既慵所稻田亦懶耘相攜作游手皆道求金銀畢  
竟金與銀何殊泥與塵且非不食物不濟飢寒人棄本  
以趨末日富而歲貧所以先聖王棄藏不為珍誰能反  
古風待君秉國鈞捐金復抵璧勿使勞生民  
私家無錢鑪平地無銅山胡為秋夏稅歲歲輸銅錢錢  
力日已重農力日已殫賤糶粟與麥賤買絲與綿歲暮  
衣食盡焉得無饑寒吾聞國之初有制垂不刊備必筭

丁口租必計桑田不求土所無不強人所難量入以為  
出上足下亦安兵興一變法兵息遂不還使我農桑人  
顛顛畎間誰能革此弊待君秉利權復彼租庸法令  
如貞觀年

京師四方則王化之本根長吏久於政然後風教敦如  
何尹京者遷次不遑巡請君屈指數十年十五人科條  
日相矯吏力亦已勤寬猛政不一民心安得淳九州雍  
為首羣牧之所遵天下率如此何以安吾民誰能變此  
法待君贊絲綸慎擇循良吏令其長子孫  
三十男有室二十女有歸近代多離亂婚姻多過期嫁



白集 卷二  
娶既不早生育常苦遲兒女未成人父母已衰羸凡人  
貴達日多在長大時欲報親不待孝心無所施哀哉三  
牲養少得及庭闈惜哉萬鍾粟多用飽妻兒誰能正婚  
禮待君張國維庶使孝子心皆無風樹悲

寓意詩五首

豫樟生深山七年而後知挺高二百丈本末皆十圍天  
子建明堂此材獨中規匠人執斤墨采度將有期孟冬  
草木枯烈火燎山陂疾風吹猛焰從根燒到枝養材三  
十年方成棟梁姿一朝爲灰燼柯葉無孑遺地雖生爾  
材天不與爾時不如糞土英猶有人掇之已矣勿重陳

重陳令人悲不悲焚燒苦但悲采用遲

赫赫京內史炎炎中書郎昨傳徵拜日恩賜頗殊常貂  
冠水蒼玉紫綬黃金章佩服身未暖已聞竄遐荒親戚  
不得別吞聲泣路旁賓客亦已散門前雀羅張富貴來  
不久倏如瓦溝霜權勢去尤速瞥若石火光不如守貧  
賤貧賤可久長傳語宦遊子且來歸故鄉  
促織不成章提壺但聞聲嗟哉蟲與鳥無實有虛名與  
君定交日久要如弟兄何以示誠信白水指爲盟雲雨  
一爲別飛沈兩難并君爲得風鵬我爲失水鯨音信日  
已疎恩分日已輕窮通尚如此何況死與生乃知擇交



難須有知入明莫將山上松結託水上萍  
翩翩兩玄鳥本是同巢鷺分飛來幾時秋夏炎涼變一  
宿蓬草廬一栖明光殿偶因銜泥處復得重相見彼矜  
杏梁貴此嗟茅棟賤眼看秋社至兩處俱難戀所託各  
暫時胡爲相歎羨  
婆娑園中樹根株大合圍蠹爾樹間蟲形質一何微孰  
謂蟲至微蟲蠹已無期孰謂樹至大花葉有衰時花衰  
夏未實葉病秋先萎樹心半爲土觀者安得知借問蟲  
何在在身在不在枝借問蟲何食食心不食皮豈無啄木  
鳥梢長將何爲

讀史五首

楚懷放靈均國政亦荒淫彷徨未忍決遠澤行悲吟漢  
文疑賈生謫置湘之陰是時刑方措此去難爲心士生  
一代閒誰不有浮沉良時真可惜亂世何足欽乃知汨  
羅恨未抵長沙深  
禍患如焚絲其來無端緒馬遷下蠶室嵇康就囹圄抱  
冤志氣屈忍恥形神沮當被戮辱時奮飛無翅羽商山  
有黃綺潁川有巢許何不從之遊超然離網罟山林少  
羈鞅世路多艱阻寄謝伐檀人慎勿嗟窮處  
漢曰大將軍少爲乞食子秦時故列侯老作鋤瓜士春



華何曄曄園中發桃李秋風忽蕭條堂上生荆杞深谷  
變爲岸桑田成海水勢去未須悲時來何足喜寄言榮  
枯者反復殊未已

含沙射人影雖病人不知巧言構人罪至死人不疑掇  
蜂殺愛子掩鼻戮寵姬弘恭陷蕭望趙高謀李斯陰德  
既必報陰禍豈虛施人事雖可罔天道終難欺明則有  
刑辟幽則有神祇苟免勿私喜鬼得而誅之

季子憔悴時婦見不下機買臣負薪日妻亦棄如遺丁  
朝黃金多佩印衣錦歸去妻不敢視婦嫂強依依富貴  
家人重貧賤妻子欺奈何貧富閒可移親愛志遂使中

人心汲汲求富貴又令下人力各競錐刀利隨分歸舍  
來一取妻孥意

和答詩十首 并序

五年春微之從東臺來不數日又左轉爲江陵士曹掾  
詔下日會于下內直歸而微之已卽路邂逅相遇於街  
衢中自永壽寺南抵新昌里北得馬上話別語不過相  
勉保方寸外形骸而已因不暇及他是夕足下次于山  
北寺僕職役不得去命季弟送行且奉新詩一軸致於  
執事凡二十章率有比興淫文艷韻無一字焉意者欲  
足下在途諷讀且以遣日時消憂懣又有以張直氣而



扶壯心也及足下到江陵寄在路所爲詩十七章凡五  
六千言言有爲章有旨迨于宮律體裁皆得作者風發  
緘開卷且喜且怪僕思牛僧孺戒不能示他人唯與杓  
直拒非及樊宗師輩三四人時一吟讀心其貴重然竊  
思之豈僕所奉者二十章遽能開足下聰明使之然也  
抑又不知足下是行也天將屈足下之道激足下之心  
使感時發憤而臻於此耶若兩不然者何立意措辭與  
足下前時詩如此之相遠也僕既羨足下詩又憐足下  
心盡欲引狂簡而和之屬直宿拘牽居無暇日故不卽  
時如意旬月來多乞病假假中稍閒且摘卷中尤者

成十章亦不下三千言其間所見同者固不能自異異  
者亦不能強同同者謂之和異者謂之答并別錄和夢  
遊春詩一章各附于本篇之末餘未和者亦續致之頃  
者在科試閒常與足下同筆硯每下筆時輒相顧共慮  
其意太切而理太周故理太周則辭繁意太切則言激  
然與足下爲文所長在於此所病亦在於此足下來序  
果有詞犯文繁之說今僕所和者猶前病也待與足下  
相見日各引所作稍刪其繁而晦其義焉餘具書白

和思歸樂

山中獨栖鳥夜半聲嚶嚶似道思歸樂行人掩泣聽皆



疑此山路遷客多南征憂憤氣不散結化為精靈我謂  
此山鳥本不因人生人心自懷土想作思歸鳴孟嘗平  
居時娛耳琴泠泠雍門一言感未奏淚沾纓魏武銅雀  
妓日與歡樂并一旦西陵望欲歌先涕零峽猿亦何意  
隴水復何情為入愁人耳皆為腸斷聲請看元侍御亦  
宿此郵亭因聽思歸鳥神氣獨安寧問君何以然道勝  
心自平雖為南遷客如在長安城云得此道來何慮亦  
何管窮達有前定憂喜無交爭所以事君日持憲立大  
庭雖有迴天力撓之終不傾况始三十餘年少有直名  
心中志氣大眼前爵祿輕君恩若雨露君威若雷霆退

不苟免難進不曲求榮在火辨玉性經霜失松貞展禽  
任三黜靈均長獨醒獲戾自東洛聚官向南荆再拜辭  
闕下長揖別公卿荆州又非遠驛路半月程漢水照天  
碧楚山插雲青江陵橘似珠宜城酒如餉徐盈切誰謂譴  
謫去未妨遊賞行人生百歲內天地暫寓形太倉一稊  
米大海一浮萍身委逍遙篇心付頭陀經尚達死生觀  
寧為寵辱驚中懷苟有主外物安能縈任意思歸樂聲  
聲啼到明

和陽城驛

商山陽城驛中有歎者誰云是元監察江陵謫去時忽



見此驛名良久涕欲垂何故陽道州名姓同於斯憐君  
 一寸心寵辱誓不移疾惡若巷伯好賢如緇衣沉吟不  
 能去意者欲改爲改爲避賢驛大署於門相荆人愛羊  
 祜戶曹改爲辭一字不忍道况兼姓呼之因題八百言  
 言直文甚奇詩成寄與我鏗若金和絲上言陽公行友  
 悌無等夷骨肉同衾裯至死不相離次言陽公迹夏邑  
 始棲遲鄉人化其風少長皆孝慈次言陽公道終日對  
 酒卮兄弟笑相顧醉貌紅怡怡次言陽公節蹇蹇居諫  
 司誓心除國蠹決死犯天威終言陽公命左遷天一涯  
 道州炎瘴地身不得生歸一一皆實錄事事無子遺凡

是爲善者聞之惻然悲道州旣已矣往者不可追何世  
 無其人來者亦可思願以君子文告彼大樂師附於雅  
 歌末奏之白玉墀天子聞此章教化如法施直諫從如  
 流佞臣惡如疵宰相聞此章政柄端正持進賢不知倦  
 去邪勿復疑憲臣聞此章不敢懷依違諫官聞此章不  
 忍縱詭隨然後告史氏舊史有前規若作陽公傳欲令  
 後世知不勞敘世家不用費文辭但使國史上全錄元  
 稹詩

答桐花

山木多蒼鬱茲桐獨亭亭葉重碧雲在  
 花簇紫霞英是



時三月天春暖山雨晴夜色向月淺聞香隨風輕行者  
多商賈居者悉黎民無人解賞愛有客獨屏營手攀花  
枝立足蹋花影行生憐不得所死欲揚其聲截為天子  
琴刻作古人形云待我成器薦之於穆清誠是君子心  
恐非草木情胡為愛其華而反傷其生老龜被剝腸不  
如無神靈雄雞自斷尾不願為犧牲况此好顏色花紫  
葉青青宜遂天地性忍加刀斧刑我思五十力拔入九  
重城當君正殿栽花葉生光晶上對月中桂下覆塔前  
冀汎拂香爐煙隱映斧藻屏為君布綠陰當暑蔭軒楹  
沉人綠滿地桃李不敢爭為君發清韻泠泠如叩瓊

風來聲滿耳鄭衛不足聽受君封植力不獨吐芬馨助  
君行春今開花應晴明受君雨露恩不獨含芳榮戒君  
無戲言剪葉封弟兄受君歲月功不獨資生成為君長  
高枝鳳凰上頭鳴一鳴君萬歲壽如山不願再鳴萬人  
泰泰階為之平如何有此用幽滯在巖坳涓從切歲月不  
爾駐孤芳坐凋零請向桐枝上為余題姓名待余有勢  
力移爾獻丹庭

和大觜鳥

鳥者種有二名同性不同觜小者慈孝觜大者貪庸觜  
大命又長生來十餘冬物老顏色變頭毛白茸茸飛來



庭樹上初但驚兒童老巫生奸計與鳥意潛通云是非  
凡鳥遙見起敬恭千歲乃一出喜賀主人翁祥瑞來白  
日神靈占知風陰作北斗使能爲人吉凶此鳥所止家  
家產日夜豐上以致壽考下可宜田農主人富家子身  
老心童蒙隨巫拜復祝婦姑亦相從殺雞薦其肉敬若  
裡六宗鳥喜張大觜飛接在虛空鳥既飽羶腥巫亦饗  
甘濃鳥巫互相利不復兩西東日日營巢窟稍稍近房  
櫛雖生八九子誰辨其雌雄羣雛又長成衆觜逞殘兇  
探巢吞鷲卵入族啄蠶虫豈無乘秋隼羈絆委高墉但  
食鳥殘肉無施搏擊功亦有能言鸚翅碧觜距紅暫曾

說鳥罪囚閉在深籠青青窓前柳鬱鬱井上桐食鳥占  
栖息慈鳥獨不容慈鳥爾奚爲來往何憧憧曉去先晨  
鼓暮歸後昏鐘辛苦塵土間飛啄禾黍叢得食將母哺  
飢腸不自克主人憎慈鳥命子削彈弓絃續會稽竹丸  
鑄荆山銅慈鳥求母食飛下爾庭中數粒未入口一丸  
已中脣仰天號一聲似欲訴蒼穹反哺日未足非是惜  
微躬誰能持此冤一爲問化工胡然大觜鳥竟得天年  
終

答四皓廟

天下有道見無道卷懷之此乃聖人語吾聞諸仲尼矯



矯四先生同稟希世資隨時有顯晦秉道無磷緇秦皇  
肆暴虐二世遭亂離先生相隨去商嶺採紫芝君看秦  
獄中戮辱者李斯劉項爭天下謀臣竟悅隨先生如鸞  
鶴出入冥冥飛君看齊鼎中焦爛者酈其子房得沛公  
自謂相遇遲八難掉舌樞三畧役心機辛苦十數年晝  
夜形神疲竟雜霸者道徒稱帝者師子房爾則能此非  
吾所宜漢高之季年嬖寵鍾所私家嫡欲廢奪骨肉相  
憂疑豈無子房口口舌無所施亦有陳平心心計將何  
爲皓皓四先生高冠危映眉從容下南山顧盼入東闈  
前瞻惠太子左右生羽儀却顧戚夫人楚舞無光輝心

不畫一計口不吐一詞闇定天下本遂安劉氏危子房  
吾則能此非爾所知先生道既光太子禮甚卑安車留  
不住功成棄如遺如彼旱天雲一雨百穀滋澤則在天  
下雲復歸希夷勿高巢與由勿尚呂與伊巢由往不返  
伊呂去不歸豈如四先生出處兩逶迤何必長隱逸何  
必長濟時由來聖人道無朕不可窺卷之不盈握舒之  
且八陲先生道甚明夫子猶或非願子辨其惑爲予吟  
此詩

和雉媒

吟君雉媒什一晒復一歎和一何晚今日乃成篇豈



唯鳥有之抑亦人復然張陳刎頸交竟以勢不完至今  
不平氣塞絕而水源趙襄骨肉親亦以利相殘至  
今不善名高於磨笄山况此籠中雉志在飲啄聞稻梁  
暫入口性已隨人遷身苦亦自忘同族何足言但恨為  
媒拙不足以自全勸君今日後養鳥養青鸞青鸞一失  
侶至死守孤單勸君今日後結客結任安主人賓客去  
獨住在門闌

和松樹

亭亭山上松——生朝陽森聳上參天柯條百尺長漠  
漠塵中槐兩兩夾康莊婆娑低覆地枝幹亦尋常八月

白露降槐葉次第黃歲暮滿山雪松色鬱青蒼彼如君  
子心秉操貫冰霜此如小人面變態隨炎涼共知松勝  
槐誠欲栽道傍糞土種瑤草瑤草終不芳尚可以斧斤  
伐之為棟梁殺身獲其所為君構明堂不然終天年老  
死在南岡不願亞枝葉低隨槐樹行

答箭鏃

矢人職司憂為箭恐不精精則利其鏃錯磨鋒鏘成插  
以青竹切羽之赤鴈翎勿言分寸鐵為用乃長兵  
聞有狗盜者晝伏夜潛行摩子拭箭鏃夜射不待明一  
盜既流血百犬同吠聲狺狺嗥不已主人為之驚盜心



憎主人主人不知情反責鏃大利矢人獲罪名寄言控  
弦者願君少留聽何不向西射西天有狼星何不向東  
射東海有長鯨不然學仁貴三矢平虜廷不然學仲連  
一發下燕城胡爲射小盜此用無乃輕徒沾一點血虛  
汚箭頭腥

和古社

廢村多年樹生在古社隈爲作妖狐窟心空身未摧妖  
狐變美女社樹成樓臺黃昏行人過見者心徘徊飢鷓  
竟不提老犬反爲媒歲媚年少客十去九不迴昨夜雲  
雨合烈風驅迅雷風拔樹根出雷劈社壇開飛電化爲

火妖狐燒作灰天明至其所清曠無氛埃舊地葺村落  
新田闢荒萊始知天降火不必常爲災勿謂神默默勿  
謂天恢恢勿喜犬不捕勿誇鷓不猜寄言狐媚者天火  
有時來

和分水嶺

高嶺峻稜稜細泉流疊疊勢分合不得東西隨所委悠  
悠草蔓底濺濺石罅裏分流來幾年晝夜兩如此朝宗  
遠不及去海三千里浸潤小無功山苗長旱死縈紆用  
無所奔迫流不巳唯作嗚咽聲夜入行人耳有源殊不  
竭無坎終難至同出而異流君看何所似有似骨肉親



白集 卷三  
派別從茲始，又似勢利交。波瀾相背起，所以贈君詩。將君何所比，不比山上泉。比君井中水。

有木詩八首 并序

余嘗讀漢書列傳，見佞順媮切於檢，嬰切於何，圖身忘國如張禹輩者，見惑上蠱，下交亂君親，如江充輩者，見暴狼跋扈，壅君樹黨，如梁冀輩者，見色仁行違，先德後賊，如王莽輩者，又見外狀恢弘，中無實用者，又見附離權勢，隨之覆亡者，其初皆有動人之才，足以感眾媚主，莫不合於始而敗於終也。因引風人騷人之興賦，有木八章，不獨諷前人，亦儆後代爾。

有木名弱柳，結根近清地。風煙借顏色，雨露助華滋。峩峩白雪毛，嫋嫋青絲枝。漸密陰自庇，轉高梢四垂。截枝扶為杖，軟弱不自持。折條用樊圃，柔脆非其宜。為樹信可翫，論材何所施。可惜金堤地，栽之徒爾為。

有木名櫻桃，得地早滋茂。葉密獨承日，花繁偏受露。迎風聞搖動，引鳥自來去。鳥啄子難成，風來枝莫住。低軟易攀翫，佳人屢迴顧。色求桃李饒，心向松筠妬。好是映牆花，本非當軒樹。所以姓蕭人，曾為伐櫻賦。

有木秋不凋，青青在江北。謂為洞庭橘，美人自移植。上受顧盼恩，下勤澆溉力。實成乃是枳，臭苦不堪食。物有



似是者真偽何由識美人默無言對之長歎息中含害  
 物意外矯凌霜色仍向枝葉間潛生刺如棘  
 有木名杜梨陰森覆丘壑心蠹已空朽根深尚盤薄媚  
 狐言語巧妖鳥聲音惡憑此為巢穴往來互棲託四傍  
 五六本枝葉相交錯借問因何生秋風吹子落為長社  
 壇下無人敢艾師銜切所幾度野火來風迴燒不着  
 有木香冉冉山頭生方伐切主人不知名移種近軒  
 闥愛其有芳味因以調麴蘖前後曾飲者十人無一活  
 豈徒悔封植兼亦誤采掇試問識藥人始知名野葛年  
 深已滋蔓刀斧不可伐何時猛風來為我連枝拔

有木名水榿遠望青童童根株非勁挺柯葉多蒙籠彩  
 翠色如柏鱗皴七倫切皮似松為同松柏類得列嘉樹中  
 枝弱不勝雪勢高常懼風雪壓低還舉風吹西復東柔  
 芳甚楊柳早落先梧桐惟有一堪賞中心無蠹虫  
 有木名凌霄擢秀非孤標偶依一株樹遂抽百尺條託  
 根附樹身開花寄樹梢自謂得其勢無因有動搖一日  
 樹摧倒獨立暫飄飄疾風從東起吹折不終朝朝為拂  
 雲花暮為委地樵寄言立身者勿學柔弱苗  
 有木名丹桂四時香馥馥花團夜雪明葉剪春雲綠風  
 影清似水霜枝冷如玉獨占小山幽不容凡鳥宿匠人



愛芳直裁截為厦屋幹細力未成用之君自速重任雖  
大過直心終不曲縱非梁棟材猶勝尋常木

歎魯二首

季桓心豈忠其富過周公陽貨道豈正其權執國命由  
來富與權不繫才與賢所託得其地雖愚亦獲安苑肥  
因糞壤鼠穩依社壇虫獸尚如此豈謂無因緣  
展禽胡為者直道竟三黜顏子何如人屢空聊過日皆  
懷王佐道不踐陪臣秩自古無奈何命為時所屈有如  
草木分天各與其一荔枝非名花牡丹無甘實

反鮑明遠白頭吟

炎炎者烈火營營者小蠅火不熱真玉蠅不點清水此  
苟無所受彼莫能相仍乃知物性中各有能不能古稱  
怨恨死則人有所懲懲淫或應可在道未為弘譬如蠅  
鷄徒啾啾啁卓龍鵬宜當委之去寥廓高飛騰豈能沉  
塵下區區酬怨憎胡為坐自苦吞悲仍撫膺

青塚

上有飢鷹號下有枯蓬走茫茫邊雪裏一掬沙培塿傳  
是昭君墓埋閉蛾眉久凝脂化為泥鉛黛復何有時有  
陰怨氣常生墳左右鬱鬱如苦霧不隨骨銷朽婦人無  
他才榮枯繫妍否何乃明妃命獨懸畫工手丹青一註



白集 卷二  
誤白黑相紛糾計遂使君眼中西施作嫫母同儕傾寵  
幸異數為配偶禍福安可知美顏不如醜何言一時事  
可戒千年後特報後來姝不須倚眉首無辭插荆釵嫁  
作貧家婦不見青塚上行人為澆酒

雜感

君子防悔尤賢人戒行藏嫌疑遠瓜李言動慎毫芒立  
教固如此撫事有非常為君持所感仰面問蒼蒼名大齧  
桃樹根李樹反見傷老龜烹不爛延禍及枯桑城門自  
焚蕪池魚懼其殃陽貨肆兇暴仲尼畏於匡魯酒薄如  
水邯鄲音寒開戰場伯禽鞭見血過矢由成王都尉身

降虜官刑加子長呂安兄不道都市殺嵇康斯人死已  
久其事甚昭彰是非不由已禍患安可防使我千載後  
涕泗滿衣裳




白氏長慶集卷第二終

終

凡不載者皆非本集所載也

此處為書中正文，因紙質泛黃及印刷模糊，文字極其淡且難以辨認。依稀可見其為多行排列的詩文內容。





A 1000  
1000



